



Broj: 02-04-799/22

Datum, 30.05.2022. godine

ZAPISNIK sa 17. redovne sjednice 7. saziva Općinskog vijeća Doboj Istok

Sedamnaesta redovna sjednica 7. saziva Općinskog vijeća održana je dana 26.05.2022. godine u zgradi općine Doboj Istok u Klokočnici sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko invalidsku zaštitu i opću upravu, Jusuf Mustafić, direktor JP Veterinarska stanica d.o.o. Doboj Istok, Rasim Sofić, tehnički direktor JKP „Čisto“ d.o.o. Doboj Istok, Adem Muratović, predstavnik Općinskog suda u Gračanici, Faruk Hasančević, šef Porezne ispostave Doboj Istok i predstavnik Televizije Tuzlanskog kantona.

Sjednicu je otvorio zamjenik predsjedavajućeg Općinskog vijeća, Izet Hodžić.

Izet Hodžić, zamjenik predsjedavajućeg Općinskog vijeća: „Otvaram 17. redovnu sjednicu 7. saziva Općinskog vijeća Doboj Istok i prije nego što krenemo sa zvaničnim radom ove sjednice koristim priliku da poselamim i pozdravim kolege i kolegice, takođe da selamim i pozdravim općinskog načelnika sa saradnicima, naše goste predstavnika Javnog komunalnog preduzeća „Čisto“ i predstavnika Općinskog suda u Gračanici. Nadam se da će i ostali predstavnici koji treba da budu prisutni stići u toku sjednice. Prije nego što krenemo sa redovnim radom sjednice Općinskog vijeća imamo svečanu priliku, odnosno imamo polaganje svečane izjave našeg kolege Sefira Halilovića, tako da bih ja pozvao kolegu da da svečanu izjavu. Ja ću čitati tekst svečane izjave, a Sefir će ponavljati za mnom. Molim i ostale kolege da slušaju izjavu, jer nije zgoreg ponoviti gradivo. Tekst svečane izjave:

Ja Sefir Halilović, svečano izjavljujem da ću povjerenju dužnost obavljati savjesno i odgovorno, pridržavati se Ustava i zakona Bosne i Hercegovine, Federacije Bosne i Hercegovine, Tuzlanskog kantona, te Statuta Općine Doboj Istok, zalagati se za ljudska prava i slobode, za ravnopravnost građana i da ću u svim prilikama štiti interese i boriti se za izgradnju i napredak općine Doboj Istok.

Kolegi čestitam i sa ovom svečanom izjavom kolega je punopravni član Općinskog vijeća Doboj Istok. Čestitam mu i želim uspješan rad.

Molim tehničkog sekretara da utvrdi broj prisutnih na današnjoj sjednici. Konstatujem da je na 17. redovnoj sjednici Općinskog vijeća prisutno svih 17 vijećnika i da Vijeće može pravosnažno donositi odluke.“

USVAJANJE ZAPISNIKA SA PRETHODNE SJEDNICE OPĆINSKOG VIJEĆA

Izet Hodžić, zamjenik predsjedavajućeg Općinskog vijeća: „Zapisnik sa 16. redovne sjednice Općinskog vijeća Doboj Istok ste dobili u materijalima i ako neko ima primjedbi na ovaj zapisnik može da iznese. Ako nema, molim vas da se izjasnimo o prihvatanju zapisnika. Ko je za zapisnik?

Glasanje: ZA – 17, PROTIV – 0, UZDRŽANIH – 0.

Konstatujem da je Zapisnik sa 16. redovne sjednice prihvaćen jednoglasnom odlukom prisutnih vijećnika. Iskoristit ću priliku da pozdravim i poselamim direktora JP Veterinarska stanica koji je u međuvremenu stigao.“

VIJEĆNIČKA PITANJA

Izet Hodžić, zamjenik predsjedavajućeg Općinskog vijeća: „Ako ima neko pripremljeno vijećničko pitanje dajem mogućnost za postavljanje istih. Nema.“

USVAJANJE DNEVNOG REDA

Izet Hodžić, zamjenik predsjedavajućeg Općinskog vijeća: „Imamo predloženi dnevni red koji je Kolegij Općinskog vijeća na svojoj zadnjoj sjednici dao kao prijedlog dnevnog reda za ovu sjednicu. Jednoglasnom odlukom članova Kolegija usvojen je prijedlog dnevnog reda koji sadrži 9 tačaka. Ja ću pročitati pojedinačno svaku tačku.“

1. Razmatranje i usvajanje prijedloga Odluke o razrješenju predsjedavajućeg Općinskog vijeća Doboj Istok,
2. Izbor i imenovanje predsjedavajućeg Općinskog vijeća Doboj Istok,
3. Razmatranje i usvajanje prijedloga Odluke o utvrđivanju javnog interesa da se izvrši sanacija i konzervacija stare kuće sa okućnicom u Bosansku kuću u Brijesnici Maloj,
4. Razmatranje i usvajanje Izvještaja o radu JKP "Čisto" d.o.o. Doboj Istok za 2021. godinu
5. Razmatranje i usvajanje Izvještaja o radu JP Veterinarska stanica d.o.o. Doboj Istok za 2021. godinu
6. Razmatranje i usvajanje Informacije o radu Općinskog suda u Gračanici za 2021. godinu
7. Razmatranje i usvajanje Informacije o radu Porezne ispostave Doboj Istok za 2021. godinu
8. Razmatranje i usvajanje Informacije o izvršenju Budžeta općine Doboj Istok u periodu 01.01. – 31.03.2022. godine
9. Razmatranje i usvajanje Programa obilježavanja 4. jula Dana brigade.

Dnevni red stavljam na razmatranje ako ima eventualno nekakvih primjedbi na predloženi dnevni red. Konstatujem da nema. Dnevni red stavljam na glasanje. Ko je za predloženi dnevni red? Molim vas da se izjasnite dizanjem ruku.

Glasanje: ZA – 17, PROTIV – 0, UZDRŽANIH – 0.

Konstatujem da je predloženi dnevni red usvojen jednoglasno.“

REALIZACIJA DNEVNOG REDA

1. Razmatranje i usvajanje prijedloga Odluke o razrješenju predsjedavajućeg Općinskog vijeća Doboj Istok

Izet Hodžić, zamjenik predsjedavajućeg Općinskog vijeća: „Prijedlog Odluke ste dobili u materijalima. Znači da bi imenovali novog predsjedavajućeg Općinsko vijeće treba da donese odluku o razrješenju postojećeg predsjedavajućeg Općinskog vijeća Doboj Istok. Mogu da kažem da smo dobili saglasnost od Centralne izborne komisije i pozivam predsjednika Komisije za izbor i imenovanje ako smatra da je potrebno da se obrati članovima Vijeća pošto je to u nadležnosti komisije.“

Hasan Hasančević, predsjednik kluba vijećnika SDA: „Uvažene kolegice i kolege, načelnice sa saradnicima, direktori javnih preduzeća, predstavniče Suda želim iskreno da vas poselamim i pozdravim. Komisija je imala dva zasjedanja i po prvoj i po drugoj tački dnevnog reda. Proceduralno je sve završeno onako kako treba. Znači poslata je ostavka Selmina Karića prema Centralnoj izbornoj komisiji i čekali smo da se to sve iskristališe i datumski poveže. Komisija predlaže Odluku o razrješenju predsjedavajućeg, kao i Odluku za imenovanje predsjedavajućeg.“

Izet Hodžić, zamjenik predsjedavajućeg Općinskog vijeća: „Hvala kolega Hasane. Otvaram diskusiju ako neko ima po ovoj tački, bujrum. Nema. Tačku stavljam na glasanje. Ko je za Odluku o razrješenju predsjedavajućeg Općinskog vijeća Doboj Istok? “

Glasanje: ZA – 17, PROTIV – 0, UZDRŽANIH – 0.

Konstatujem da je jednoglasnom odlukom dosadašnji predsjedavajući Općinskog vijeća razriješen te pozicije.“

2. Izbor i imenovanje predsjedavajućeg Općinskog vijeća Doboj Istok

Izet Hodžić, zamjenik predsjedavajućeg Općinskog vijeća: „ Prijedlog Odluke ste dobili u materijalima. Mogu da kažem da je potrebna procedura za donošenje Odluke sprovedena u skladu sa Poslovníkom o radu Općinskog vijeća. Ovdje imamo jedan prijedlog koji je u skladu sa članom 138. Poslovníka o radu. Tačku dnevnog reda stavljam na diskusiju ako ima neko potrebe da diskutuje.“

Emira Karić, predsjednica kluba vijećnika SDP: „Srdačno pozdravljam sve prisutne, medije pogotovo i goste. Što se tiče ove tačke dnevnog reda ja bih jednu kratku diskusiju morala ovdje kazati. Ovdje se ne radi ništa lično nego je to neki moj određeni stav. Znam da postoje pravila igre, postoje i sujete, ali kada se biraju ljudi na određenim funkcijama po meni jedino pravilo igre je osoba sa najvećim kompetencijama i sa najviše iskustva. U našem sazivu Vijeća pod broj 1. osoba sa najboljim kompetencijama i sa najviše iskustva je kolega i gospodin Mehmed Mehinović. Kažem opet postoje pravila igre i ta pravila često demorališu mlade osobe da iskazuju svoje sposobnosti u nekim budućim vremenima.“

Izet Hodžić, zamjenik predsjedavajućeg Općinskog vijeća: „ Hvala Emira. Ima li još neko za diskusiju? Nema. Zaključujem raspravu. Poslovníkom o radu je predviđeno da glasanje bude tajno, međutim napisano je i ako se drugačije ne izjasni Općinsko vijeće. Znači pošto imamo jednog kandidata ja predlažem da glasanje o predsjedavajućem Općinskog vijeća bude javno, aklamacijom. Da nema više kandidata onda bi bilo u redu, a Poslovník nam je dao mogućnost da možemo raditi i na ovakav način s tim da bi se trebali izjasniti jesmo li za ovakav prijedlog. Ko je za da se izjašnjavamo javno?

Glasanje: ZA – 17, PROTIV – 0, UZDRŽANIH – 0.

Konstatujem da je jednoglasnom odlukom prihvaćen zaključak ili prijedlog da se predsjedavajući Općinskog vijeća bira javno aklamacijom. Obzirom da imamo prijedlog Odluke i jedini kandidat za predsjedavajućeg Općinskog vijeća je kolega Nusret Dautović, pa pozivam prisutne da se izjasne ko je za da se Nusret Dautović imenuje za predsjedavajućeg Općinskog vijeća Doboj Istok?

Glasanje: ZA – 13, PROTIV – 0, UZDRŽANIH – 4.

Konstatujem da je sa 13 glasova za od 17 vijećnika izabran Dautović Nusret za predsjedavajućeg Općinskog vijeća Doboj Istok. Kolegu Dautovića pozivam da zauzme svoju stolicu. Koristim priliku da čestitam kolegi Nusretu i da poželim uspješan rad u nastavku funkcionisanja Općinskog vijeća. Naravno Nusret će nastaviti sa vođenjem sjednice Općinskog vijeća kako je predviđeno po Poslovníku.“

Nusret Dautović, predsjedavajući Općinskog vijeća: „ Prije svega da se zahvalim vijećnicima i vijećnicama koji su glasali danas za mene i koji nisu glasali. Htio bih da poselamim i pozdravim uvaženog načelnika, vijećnike i sve direktore koji su prisutni, kao i predstavnika Suda iz Gračanice.“

3. Razmatranje i usvajanje prijedloga Odluke o utvrđivanju javnog interesa da se izvrši sanacija i konzervacija stare kuće sa okućnicom u Bosansku kuću u Brijesnici Maloj

Nusret Dautović, predsjedavajući Općinskog vijeća: „ Tačku stavljam na raspravu. Ima li neko potrebu po ovoj tački da se izjasni. Ako se niko ne javlja za diskusiju, ja dajem ovu tačku na glasanje. Ko je za usvajanje prijedloga Odluke o utvrđivanju javnog interesa da se izvrši sanacija i konzervacija stare kuće sa okućnicom u Bosansku kuću u Brijesnici Maloj?“

Glasanje: ZA – 17, PROTIV – 0, UZDRŽANIH – 0.

4. Razmatranje i usvajanje Izvještaja o radu JKP “Čisto” d.o.o. Doboj Istok za 2021. godinu

Nusret Dautović, predsjedavajući Općinskog vijeća: „ Tačku stavljam na diskusiju.“

Mehmed Mehinović, vijećnik SBiH: „ Prije svega koristim priliku da predsjedavajućem čestitam i da mu zaželim svako dobro. Naravno puno mudrosti on ima sigurno i razumijevanja i nadam se da ćemo raditi kao što smo i do sada radili. Ujedno da se zahvalim dopredsjedavajućem koji je vodio ove zadnje dvije – tri sjednice dosta efikasno i dobro i bilo nam je lijepo i sa njim i nadam se da će se u tom trendu i nastaviti. Izvještaj JKP „Čisto“ – ja sam na neki način sentimentalno vezan za ovo komunalno preduzeće i ono zaslužuju da to bude tako, jer su i oni nešto sa čime je općina Doboj Istok prepoznatljiva i treba da se ponosi. Imamo dobro vodosnabdijevanje, poprilično čak i dobro smo čisti i to su razlozi koji idu u prilog tome. Često smo za ovom govornicom i ja i vi imali priliku da čujemo da kada su izvještaji preduzeća i mjesnih zajednica da se napravi neki urnek kako bi izgledao izvještaj da bude lakše vijećnicima snaći se. Ovo je jedan od primjera kako bi trebao da izgleda dobar izvještaj i ovaj izvještaj nije za Općinsko vijeće, ovaj izvještaj je za Evropski parlament. Slobodno ću to kazati da sam siguran da može i Evropski parlamet ovakav izvještaj pogledati. Nema šta nema u njemu i ko se ne može snaći i šta god ga interesuje može vidjeti ovdje. U to ime imaju moje čestitke. Dugo

sam vodio plan i analizu u jednom velikom preduzeću i ovaj izvještaj ima sve kao što se kaže od glave do repa, šta koga interesuje uvod, zaključak i preporučene tabele od Međunarodnog monetarnog fonda, učešće prihoda i rashoda, analitički razrađeno sve kako treba i prema tome ja sam sa uživanjem pratio ovo. Ima nekoliko opaski koje govore u prilog ovome da ne bude samo da pričam priče. Ko je imao prilike da vidi 133.138 računa za vodu, a preračunato na mjesečni iznos to je 3762 računa za vodu ili dnevno 125 računa za vodu se pravi svaki dan. Znači 125 računa svaki dan u prosjeku se kuca. Za smeće 1919, dnevno 87 i to je 212 računa po pet minuta da se to uradi, to izađe 1060 minuta ili 18 sati. Dva radnika minimalno treba da rade samo na ovim poslovima, a da ne govorimo o drugim poslovima, a znam da svašta rade. Evo i to je jedan od razloga koji govori u prilog tome kako treba da se radi. Naravno nije ovo sve stvoreno sada, neko je udario temelje tom preduzeću, jer bilo je teških trenutaka, dosta teških. Ljudi su dali živaca, koji su radili tamo od početka i koji su pomagali kao osnivač, međutim evo došlo se na neku crtu, na zelenu granu iako se ne može reći da sva preduzeća rade u profitu. Ko prati izvještaj o radu Komunalnog preduzeća „Čisto“ može na strani 7. vidjeti konto 60230 prihodi od rada i vodomaterijala. Ti prihodi su narasli na čak 26.000. To nekome izgleda malo, međutim nekada ti prihodi nisu bili ni 2 ili 3.000, a sada skoro za 10 puta. To je trud baš komunalnog preduzećai to je ono čemu ja odajem priznanje. Kada pogledate bilans stanja preduzeća sve je bolja i bolja situacija. Oni su pravili ono kako se pravi '21. godinu, pa '20. godinu, pa '19. godinu, pa indekse poredali i vidi se da se potraživanja smanjuju iz godine u godinu i ove godine su ona smanjena na 183.864, da su obaveze takođe drastično smanjene. To ide u prilog mojoj diskusiji zbog čega sam ovako diskutovao. Strana 15. koja je meni jako interesantna, jer znam koliko su imali posla oko upotrebne, odnosno vodne dozvole za vodosnabdijevanje u Velikoj Brijesnici, bunar u Velikoj Brijesnici i zahvaljujući izvršnom organu općine uspjeli su riješiti i oni pohvaljuju izvršni organ. Oni obavještavaju da je vodna dozvola, odnosno upotrebna dozvola vodovoda u Brijesnici završena i da imamo upotrebnu dozvolu. To je jako jako dobra stvar, dugo se radilo na tome, bile su to, da se tako izrazim, porođajne muke, međutim evo ljudi su svojim znanjem i upornosti uspjeli da riješe taj problem. I zato im ja čestitam, jer to nimalo nije bilo lako. Naravno ono na čemu treba raditi kada govorimo o komunalnom preduzeću je smeće i to će biti boljka do daljnjeg i tu im naravno izvršni organ mora pomoći da se uključi što više stanovnika u odvoz smeća da bi naša općina bila još čišća i prepoznatljiva po čistoći. Imao sam ja svašta nešto pričati o ljudskim resursima i naravno oni su markirali to kao problem, menadžment preduzeća je to markirao kao problem da je starosna struktura takva da treba zapošljavati mlađe radnike, a djelatnost je takva da trebaju mlađi radnici. Prijedlog mjera na kraju, a ja sam rekao na početku da ovaj izvještaj ima uvod, pa osnovni podaci, pa prihodi, pa rashodi, pa bilans stanja, rezultat poslovanja, pa vodosnabdijevanje, pa pijaca, pa ovo, pa ono i ja ću završiti svoje izlaganje sa prijedlogom mjera koje je ponudio menadžment, a usvojio je Nadzorni organ, a usvojila je i Skupština preduzeća i dat je prijedlog da prihod iz dobiti iz naredne godine ide za opremanje i modernizaciju preduzeća, a ostatak da ide u rezerve ako se ne potroši. Međutim prijedlog mjera menadžmenta, direktora sa svojim saradnicima, je pod 2. rekao prioritarno i u što kraćem roku donošenje novih cijena usluga odvoza komunalnog otpada. Naravno dobro je da su ovo oni stavili, međutim mislim da u izbornoj godini neće niko potegnuti ovo pitanje i ovo je nešto što u ovom trenutku nije trebalo. Ovo se moglo poslije izbora staviti, a znam da ovaj cjenovnik i ako općina ne bude imala da to sufinansira još u većem iznosu da će doći ovo na red ovom Vijeću vjerovatno, možda početkom iduće godine. Oni nisu rekli samo šta treba osnivač da radi oko ovog preduzeća, nego su u prijedlogu broj 7. Povećanje likvidnosti preduzeća sa značajnijim projektima (ljetno održavanje puteva, uređenje kanala, regulacija vodotoka i sl.) koje preko Općine usmjeravati na preduzeće. Direktor i svi zaposleni u preduzeću svojim angažmanom da rade na obezbijedenju ovakvih projekata i internim uštedama. Znači ne štete ni sebe, a traže ono što treba. Zaista ovo preduzeće, kao i svi radnici, zaslužuje da im svi mi odamo priznanje na ovakvim rezultatima, a menadžmentu na ovakvom izvještaju. Oni su nama posebno važni i da u idućem periodu nastave sa ovakvim radom, pa ako može da bude i korak naprijed.“

Nusret Dautović, predsjedavajući Općinskog vijeća: „Zahvaljujem se uvaženom vijećniku Mehinoviću. Prije nego što dam riječ drugim vijećnicima da konstatujem da je Zerina Subašić napustila sjednicu u 10,23 i da se javila zamjeniku predsjedavajućeg Općinskog vijeća, pa konstatujem da je sada prisutno 16 vijećnika. Dajem dalje na raspravu ovu tačku dnevnog reda. Javlja li se ko za riječ? Pošto nema više prijavljenih stavljam ovu tačku dnevnog reda na glasanje. Ko je zaovakav izvještaj?“

Glasanje: ZA – 16, PROTIV – 0, UZDRŽANIH – 0.

5. Razmatranje i usvajanje Izvještaja o radu JP Veterinarska stanica d.o.o. Doboj Istok za 2021. godinu

Nusret Dautović, predsjedavajući Općinskog vijeća: „Ima li neko od vijećnika da se javlja za riječ? Pošto nema prijavljenih diskutanata stavljam ovu tačku dnevnog reda na glasanje. Ko je za ovakav Izvještaj JP Veterinarska stanica?“

Glasanje: ZA – 16, PROTIV – 0, UZDRŽANIH – 0.

6. Razmatranje i usvajanje Informacije o radu Općinskog suda u Gračanici za 2021. godinu

Nusret Dautović, predsjedavajući Općinskog vijeća: „Ima li prijavljenih diskutanata? Pošto nema prijavljenih stavljam tačku dnevnog reda na usvajanje. Ko je za ovakvu Informaciju?“

Glasanje: ZA – 16, PROTIV – 0, UZDRŽANIH – 0.

Predsjedavajući je dao pauzu od 5 minuta.

7. Razmatranje i usvajanje Informacije o radu Porezne ispostave Doboj Istok za 2021. godinu

Nusret Dautović, predsjedavajući Općinskog vijeća: „Javlja li se neko od vijećnika za riječ?“

Senada Džanić, predsjednica kluba vijećnika SBB – BPS: „Sve vas pozdravljam i selamim. Predsjedavajućem Općinskog vijeća čestitam i želim uspješan rad u interesu svih građana Doboj Istoka. Ne mogu a da ne kažem nekoliko riječi o Poreznoj ispostavi Doboj Istok. Ovo govorim kao građanka, kao direktorica srednje škole i općinska vijećnica. O informaciji mogu reći da je kao i u prethodnim periodima jasna, razumljiva i sažeta i da je obuhvaćeno sve što ovakva informacija treba da sadrži. U ispostavi rade tri izvršioca koji su pokazatelj kako se timski radi. Posebno bih istakla sam odnos prema građanima, a ovo govorim ispred srednje škole da je u vrijeme pandemije bila takva saradnja da se još jedanput zahvaljujem, a mi smo uručili priznanje našoj Poreskoj ispostavi. Vidim da je Kantonalna poreska ispostava prepoznala taj rad i ocijenila ocjenom uspješan. Ja još jedanput čestitam i hvala vam što svoj posao radite onako kako treba.“

Mehmed Mehinović, vijećnik SBiH: „Naravno ovo je federalni organ, a ovo malo što sam prije diskutovao bio je općinski organ, općinsko preduzeće „Čisto“. Isto tako ono što sam rekao za „Čisto“ rekao bih i za ovaj federalni organ čija je ispostava ovdje sa kojom svi skupa treba da se ponosimo. Ja zaista od naših privrednika, niti od fizičkih lica, nisam nikada čuo bilo kakve primjedbe na rad ovog organa. Zato imam puno pravo izaći i reći svaka vam čast, a kada se pročita izvještaj onda to treba troduplati i troduplo reći ovo što sam rekao sada. Ja sam nekada za ovom govornicom znao po pola sata pričati kada treba analizirati našu privredu, ali neću to uraditi sada i skratit ću na najmanju moguću mjeru. Hoću da kažem da je vizija i misija koja je postavljena ovdje ispunjena skoro 100 %i zato šefe svaka čast i čestitam i želim da nastavite tako i u narednom periodu. Iskoristit ću priliku da malo prokomentarišem naplatu prihoda budžetskih fondova koji su mene zaista zaintrigirali iz niz razloga, a to je da je doprinos za PIO i MIO ova općina ostvarila u prošloj godini u odnosu na prethodnu godinu više za 569.000. To je pola miliona više. Doprinos za zdravstveno osiguranje naplaćeno više za 433.396 i to je zaista puno, ako znamo da je u ovoj godini 3.350.000 za zdravstvo dato. Samo malo uporedbe Dom zdravlja naš konzumira sredstava od Zavoda zdravstvenog osiguranja Tuzlanskog kantona negdje oko 2 miliona, 1.800.000 do 2 miliona koristi, pa evo za sekundarnu zaštitu ide preko miliona naših para u kantonalnu bolnicu. Možemo reći sa ponosom da nismo paraziti, jer se odavde ubere toliko para da možemo finansirati određene institucije. Ovo je samo iz razloga da otvorim oči onima koji se nisu bavili ovom problematikom da znate da slobodno možemo kada su druge općine u pitanju i kada su u pitanju zdravstvene institucije da možemo pričati o ovim temama vedra čela i izdignute glave. Naravno raduje me da je doprinos za nezaposlene skoro za 50.000 veći u odnosu na prošlu godinu. To su zaista podaci i kada se dođe do podataka iako sam ja dobar matematičar, solidan i znam to izračunati i analitički upoređivati, koliko su ljudi obradili, ja zaista ne znam, ali dođe mi nekada, znam da nisu lagali, da je nemoguće šta je tri čovjeka obradilo i koliko je obrazaca ispunilo, koliko je zaprimilo zahtjeva, koliko je obradilo zahtjeva i u to ime od nas čestitke i neka vas Alah nagradi i neka vam podari zdravlja da nam budete živi i zdravi.“

Kemal Bratić, općinski načelnik: „Ja ću iskoristiti priliku da čestitam novom vijećniku Sefiru Haliloviću na mandatu, a takođe ću čestitati novoizabranom, ja ću reći sa iskustvom i kompetentnom predsjedavajućem Općinskog vijeća Nusretu Dautoviću, čovjeku iza koga je bogato iskustvo u društveno – političkom životu, čovjeku koji se angažovao, ne podcjenjujući nikoga ovdje prisutnog. Smatram da je bilo koko sjedi ovdje u sali Općinskog vijeća mogao biti predsjedavajući. Nije ova odluka donesena preko noći, kao što kaže jedan predsjednik stranke, mi o tome razgovaramo dugo i smatrali smo da čovjek sa bogatim iskustvom treba da vodi ovo Općinsko vijeće. Mada, opet kažem, ovako dobar sastav Općinskog vijeća može voditi svako. Kada su vijećnici dobri, ažurni, kompetentni onda to može raditi svako. Sada ću se pozvati na

izvještaj Poreske uprave. Prije svega želim da se zahvalim šefu Poreske ispostave na jednoj dobroj i korektnoj saradnji i na razumijevanju prema našim građanima. Naravno ono što treba ubuduće da radimo jeste da se kadrovski pojačamo, ali ne petljam se u to, jer to nije naša nadležnost, jer da jeste vjerovatno bi to do sada uradili. Pozivat ću se samo na 7. stranicu i neću ništa više diskutovati, a to je uporedba ili pregled uposlenih po općinama na Tuzlanskom kantonu. Svi ste to vjerovatno pročitali i podaci su takvi kakvi jesu. Znači da je Doboj Istok 01.01.2021. godine imao 2391 uposlenog, a da je 31.12.2021. godine 2495, odnosno plus 104 uposlena u tako da kažem teškoj godini 2021. Naravno 2020. godina je bila još teža i još gora. Kada se poredimo sa drugim općinama naše veličine, ne podcjenjujući ni jednu općinu, a neću ni jednu ni imenovati, vidite da imamo negdje oko 500 uposlenih više od općine koja ima puno dužu tradiciju, puno je starija, prije je krenula sa radom itd. Što govori da su u našu općinu Doboj Istok, kao što uvaženi vijećnik Mehinović reče prije mene, udareni dobri temelji i evo nastavili smo raditi u dobrom pravcu, da stvaramo jedan dobar ambijent za naše privrednike. Privrednici ne bježe sa naše općine, nego konstantno ulažu i šire svoje biznise na našoj općini. Ako se poredi tri općine našeg ranga, koje su takođe u ovoj tabeli, vidi se da Doboj Istok sam ima više uposlenih nego te tri općine, što je opet jedna jasna poruka, naravno za one koje hoće to da vide, a ko neće to da vidi on to neće nikada vidjeti i nijekat će stalno nešto. Takođe što je bitno, a piše ispod ove tabele na strani broj 7. da je direktno na općini Doboj Istok bilo 1782 uposlenika od 01.01.2021. godine, a 31.12.2021. godine 1884, opet plus 102 novouposlena na području naše općine ili evo imamo sa datumom 04.05.2022. godine 2477 uposlenih ukupno što na području općine Doboj Istok, što na području susjednih općina, što je za mene jedan jedini pravi pokazatelj. Koliko je poreza naplaćeno? Vi znate da smo mi po tom pitanju kao lokalne zajednice dosta oštećene. Imamo evo narednu tačku izvršenje budžeta, odnosno informaciju za prva tri mjeseca, ako znamo da dobivamo od indirektnih poreza oko 1.300.000, a jedan naš srednji privrednik plati 2 – 3 miliona PDV, da ne govorim kakva je nepravda učinjena na neki način lokalnim zajednicama. I na kraju ja se iskreno nadam da će 2022. godina biti bolja, jer su svi pokazatelji da se ide u boljem pravcu i kada se radi o broju uposlenih i kada se radi o širenju i stvaranju boljeg ambijenta. Ja pretpostavljam da će i ovoj godini ako ništa makar još 100 novouposlenih biti na području općine Doboj Istok i to je ono što su najavili određeni privrednici koji rade na području naše općine. Još jednom se zahvaljujem na dobroj saradnji šefu Poreske ispostave i njegovim uposlenicima i ja se nadam da će ona u narednom periodu biti još bolja.“

Nusret Dautović, predsjedavajući Općinskog vijeća: „Hvala uvaženom načelniku. Ima li još neko da se javlja za riječ? Pitam šefa Poreske ispostave ima li potrebe da se obrati? Ako nema, stavljam tačku na glasanje. Ko je za?“

Glasanje: ZA – 16, PROTIV – 0, UZDRŽANIH – 0.

8. Razmatranje i usvajanje Informacije o izvršenju Budžeta općine Doboj Istok u periodu 01.01. – 31.03.2022. godine

Nusret Dautović, predsjedavajući Općinskog vijeća: „Javlja li se neko od prisutnih vijećnika za diskusiju? Ako nema prijavljenih stavljam ovu tačku dnevnog reda na usvajanje. Ko je za?“

Glasanje: ZA – 11, PROTIV – 0, UZDRŽANIH – 5.

Konstatujem da je 11 vijećnika za i 5 uzdržanih.“

9. Razmatranje i usvajanje Programa obilježavanja 4. jula Dana brigade

Nusret Dautović, predsjedavajući Općinskog vijeća: „Javlja li se neko od vijećnika za riječ? Ako se niko ne javlja stavljam ovu tačku dnevnog reda na izjašnjavanje. Ko je za ovakav Program?“

Glasanje: ZA – 16, PROTIV – 0, UZDRŽANIH – 0.

Sa ovom tačkom smo iscrpili dnevni red i želim da se zahvalim svim vijećnicima na korektnoj saradnji.“

Sjednica je završena u 10,50 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVALA
OPĆINSKOG VIJEĆA
Nusret Dautović

Zapisnik je usvojen na 18. redovnoj sjednici Općinskog vijeća Doboj Istok održanoj dana 30.06.2022. godine.

U Klokočnici, dana 30.06.2022. godine

Zabilješku sačinio
Omer Hadžić, sekretar Općine